



ATASSUT

UPA 2016/86-1

Siverth K. Heilmann

21. 04. 2016.

Inatsisartut aalajangiiffigisassatut siunnersuut, Naalakkersuisut peqquneqassasut neqerooruteqartarnermut inatsimmut allannguutissanik siunnersuuteqarnissaannik, sanaartornermi suliallit nunatta pissarititaanik atuinissamik kissaateqartut tapersorsorneqarnissaat siunertaralugu.

(Inatsisartunut ilaasortat Aqqaluaq B. Egede, Inuit Ataqatigiit & Peter R.-Petersen, Partii Naleraq)

Sanaartornermi suliallit nunatta pissarititaanik atuinissamik kissaateqartut tapersorsorneqarnissaat siunertaqartumik, Naalakkersuisut peqquneqarnissaannik inatsimmik allannguiniarnermik isumaq, imatut ATASSUT-miit oqaaseqarfigissavarput.

Siunnersuuteqartut tunngavilersuuteqarnerminni, uparuartuutigisarsimasannut tapersiinerattut isigaara, inissiarsuarni illuliarsuarniluunniit, oquttoqartarneranik, sannarlunneraanernik, nakkutilliinerup pitsaanerusariaqarneranik, akinnerusut ukiorpassuarnilu atasinnaasunik, nunattalu pissarititaanik atorluanerunikkut, sanaartornerup inerisarneqartuartariaqarneranik.

Sanaartornermi nunaqavissut suliaasaqaannarnissaat anguneqassappat, Namminersorlutik Oqartussat Kommuunellu aningaasaleeqatigiillutik sanaqateqartarneri pilersaarusiortuarneq suliariumannittussarsiuussinermilu piumasaqaataasut eqqumaffigineqarpata, piffinnilu assigiinngitsuni nunaqavissut amerlanerpaartaat suliaasaqaannarnissaat anguneqarsinnaavoq.

Illoqarfinni nunaqarfinnilu suliffeqarfinnut qanimut attaveqatigiittarneq assut pitsaasumik inerititaqarfiusarpoq. Suliaasaqaannarnissaq ukiuni amerlasuuni anguniarneqartuartariaqarpoq, tamanna ATASSUT-ip misilittagarilluarpaa ingerlatiinnassallugulu. Pisortat sanaartornerup iluani kisimik aningaasaliineq ajorput, namminersortut inuillu ataasiakkaat aamma puujussanngilagut sanaartortitsisarneri.

Nalunngilarput Namminersorlutik oqartussat inissiaaterpassui ima pisoqalinikuutigisut, amerlaqisut isaterneqartariaqarlutik nutarterneqartariaqarlutik aammalu nutaaliortoqassappat eqqaamanerlunngikkuma 5 mia. kr. miss. aningaasaliinerit pisariaqartinneqarput.

Sinnersuuteqartut ATASSUT-miit oqareernitsituut isumaqatigilluinnarpagut, annertunerpaamik nunatta pissarititaanik iluaquteqarluni, ukiorpassuarnilu napasinnaasunik sanaartorneq kujataani SIKUBLOCK-imik sanaartorsimaneq naleqqussaalluni, nunatta ilaani alloriaqqiffiulertarialenera ATASSUT-miit tunngaviatigut taperserparput.

ATASSUT-miilli unneqqarissumik oqaatigissavarput, qammasissiorluni illuliortitsinernut massakkornit annertunerusumik pikkorissaanissarlu siunertaralugu pilersaarusiortoqarnissaa avaqqunneqarsinnaanngimmat.

Qammasissiaq SIKUBLOCK atorlugu, Jakob Knudsen, Narsaq, pisariitsumik sanaartornikuugaluortoq, taamaattoq aamma puujussanngilarput, inissiaaterpassuagut iluarsagassat nutaaliorfigineqartussallu eqqarsaatigalugit, siunissami amerlanerusunik qammasissiortunik sulisussanik ilinniartitsinissaq.

Nutaaliorluni nutarterilluniluunniit, seqernup maligaasai atorlugit mingutsitsinngitsunillu iluaquteqarnerunissamik ATASSUT-ip eqqaajuagai, partiinut puujuinnarneqannginnissaat sakkortuumik eqqaasissutigissavarput.

Taamatut siunnersuummut tunngavilersuuteqarluta, sanaartormilulu neqerooruteqartarnermi allannguinngikkaluarni, Naalakkersuisut itigartitsinissamik inassuteqarnerat, ATASSUT-miit isumaqatigaarput.